

江都縣志

名宦 鄉賢

冊肆第

江都縣志卷之十四

江都縣知縣

五格黃湘

重修

名宦

立德立功是謂不朽祀諸賢宗蓋百世其不可沒矣其若政績卓卓有所表著而未進以法施勞定之典豈曰有其實者不當予以名歟為各次其列傳後之人撫卷而思是則是倣宜不於前賢讓遺愛焉志名宦

祠祀郡邑名宦者共三十有九人

漢董仲舒廣川人孝景時為博士武帝即位以賢良對

江都縣志

卷之十四

名宦

一

策出為江都王非相王帝兄素驕好勇仲舒以禮義匡正王敬重焉久之王問仲舒曰越王勾踐與大夫泄庸種蠡謀伐吳遂滅之孔子稱殷有三仁寡人亦以為越有三仁仲舒曰越本無一仁夫仁人者正其誼不謀其利明其道不計其功是以仲尼之徒羞稱五伯為其先詐力而後仁義也王稱善後徙膠西王相去位歸居終不問家產業以修學著書為事

仲舒江都宅故址後人即其地立專祠祀之

張綱字文紀蜀犍為人漢安元年遣八使巡行風俗綱獨埋其車輪於洛陽都亭曰豺狼當路安問狐狸遂奏梁冀等不法十五事時廣陵賊張嬰等眾數萬人寇亂

揚徐間積十餘年冀乃諷尚書以綱爲廣陵太守因欲以事中之綱單車之職將吏卒十餘人徑造嬰壘諭以順逆利害嬰深感悟明日率所部與妻子面縛歸降綱散遣部衆任從所之親爲卜居宅相田疇人情悅服綱被疾吏人皆爲禱祀祈福及卒老幼相攜赴哀者不可勝數嬰等五百餘人制服行喪送到犍爲負土成墳詔追褒之官其子續爲郎中賜錢百萬

綱在廣陵時於東陵村開渠引大石

湖水灌利農田人呼爲張公渠

陳登字元龍建安人爲廣陵太守明審賞罰威信宣布未及期年功化以就及遷東城太守廣陵吏民佩其恩

## 江都縣志

### 卷之十四

名宦

二

德共拔郡隨登老弱襁負而追之

登在郡時以休暇行城之西二十里浚源

爲塘溉浸田疇用獲豐稔民受其利名其陂曰愛敬陂後世謂之陳公塘

**唐**婁師德字宗仁鄭州原武人弱冠進士擢第授江都尉揚州長史盧承業奇其才嘗謂之曰子台輔器也後專綜邊任前後三十餘年參知政事以功名始終卒贈涼州都督諡曰貞

**宋**王琪字君玉成都華陽人珪從弟也起家進士調江都主簿上時務十二事請建義倉置營田減度僧罷鬻爵禁錦綺珠貝行鄉飲籍田復制科興學校仁宗嘉之除館閣校勘集賢校理累官淮南轉運使兩知揚州以

禮部侍郎致仕琪性孤介與時不偶數臨東南名鎮尚  
簡靜疾俗吏飾厨傳以沽名譽故待賓客頗簡略間造  
飛語起謗終且不恤卒葬眞州詔發眞揚卒護其窆蓋  
異數也琪初爲主簿時晏元獻殊過維揚憇大明寺使  
侍史誦壁間書版戒勿言姓名至琪詩始有取焉遂召  
之同飯遊池上因論曾作晚春詩無可奈何花落去句  
彌年未得對琪應聲曰似曾相識燕歸來元獻稱善卽  
用以足其篇

韓琦字稚圭相州安陽人仁宗時以資政殿學士知揚  
州增學田奏請蠲無名之稅又請常平倉米以備賑荒

江都縣志

卷之十四

名宦

三

揚民樂其愷悌愛慕之如父母爲肖像祀於雍熙院蔣  
之奇作記有云魏公前出二府而領維揚之麾後相三  
朝而建淮南之節雖十年之間屢更節鉞而終不易鎮  
則維揚之人挹魏公之德宜何如哉卒贈尚書令諡忠  
獻

歐陽修字永叔廬陵人舉進士慶歷八年知揚州寬簡  
不擾蒞政三五日間事十減五六兩月後官府閑如僧  
舍或問故曰吾寬不爲苛急簡不爲繁碎爾非廢事也  
築平山堂與賓客讌賞賦詩遂相傳爲勝蹟後拜參知  
政事卒諡文忠

包拯字希仁廬州合肥人歷仕龍圖閣直學士以喪子  
乞便郡知揚州拯性剛毅聞者皆憚之舊制凡訟訴不  
得徑造庭下拯開正門使得至前陳曲直吏不敢欺累  
遷樞密副使卒贈禮部尚書諡孝肅

羅適字正之台州寧海人元豐中爲江都令民有訟曲  
直徑決於前不以屬吏若小過輒誨諭遣去黎明視事  
入夜猶不已曰與其委成於吏民有不盡之情孰若勞  
已之耳目哉政化大行訟者益少復大石湖改名元豐  
溉田千有餘頃遠近自陳復陂塘溝渠之利者一切聽  
許水利之興復者五十有五溉田六千頃桑亦八十五

江都縣志

卷之十四

名宦

四

萬株有奇出私錢營藥給貧病之民所瘡不可勝計歲  
滿代去民思之卽邵伯埭繪像祀之

蘇軾字子瞻眉山入元祐六年以龍圖閣學士知揚州  
舊發運司主東南漕法聽操舟者私載物貨征商不得  
留難故操舟者富厚以官舟爲家補其敝漏且周船夫  
之乏故所載率皆速達無虞後一切禁而不許故舟敝  
人困多盜所載以濟饑寒公私皆病軾請復舊從之又  
嘗奏揚民爲積欠所壓檢察本州宜縱而拘於法者六  
條乞住催理從之先是蔡京守揚州宴集爲萬花會用  
芍藥數十萬枝吏緣爲奸民不勝其擾軾悉罷之未閱

歲以兵部尚書召兼侍讀後卒諡文忠

晁補之字無咎鉅野人通判揚州以文章著名而政事敏達太守蘇軾稱爲風流賢別駕旣而其弟詠之亦調揚州司法參軍軾雅重其能文顧坐客曰奇才也

岳飛字鵬舉河南相州湯陰人其勇略戰功具詳宋史建炎初自乞淮南東路一重難任使收復本路州郡乘機漸進授通泰鎮撫使與金人戰南霸橋大敗之使不得橫延郡城保捍之功甚大後爲秦檜所害天下寃之追封鄂王諡武穆改諡曰忠武

鄭興裔初名興宗顯肅皇后外家三世孫也孝宗時自

江都縣志

卷之十四

名宦

五

廬州移知揚州揚與廬舊爲鄰初興裔在廬嘗郤鄰道互送禮至是按郡籍見前所郤者有出無歸遂奏嚴其禁揚有重屯糧乏例糴他境興裔搜括滲漏以補之食遂足民舊多茅舍易焚興裔貸之錢命易以瓦自是火患乃息又奏免其償民甚德之修學宮立義塚定部轄民兵升差法郡以大治致政卒贈太尉諡忠肅

李庭芝字祥甫其先汴人徙應山淳祐進士開慶初權知揚州尋居憂後朝議擇守揚者帝曰無如庭芝乃奪情拜制置使時揚新遭火廬舍盡燬庭芝悉貸民錢使爲屋免其償一歲中官民居皆具始平山堂瞰揚城元

兵至則構望樓其上張車弩射城中庭芝築大城包之  
募汴南流民二萬人以實之命爲武銳軍又大修學爲  
詩書俎豆與士行習射禮郡中有水旱卽命發廩不足  
則以私財賑之揚民德之如父母德祐元年春賈似道  
兵潰蕪湖沿江諸郡無一人能守者庭芝率所部郡縣  
城守時李虎持招降榜入揚州庭芝誅虎焚其榜總制  
張俊持孟之縉書招降庭芝焚其書梟俊等五人於市  
日調苗再成戰其南許文德戰其北姜才施忠戰其中  
人人爲之死鬪朝廷加庭芝參知政事知樞密院事元  
阿朮攻揚久不拔乃築長圍困之城中食盡宋亡謝太

江都縣志

卷之十四

名宦

六

后及瀛國公爲招諭之降庭芝登城曰奉詔守城未聞  
有詔諭降也已而兩宮至瓜洲復詔庭芝庭芝命發弩  
射使者阿朮使人持詔招降庭芝開壁納使者斬之焚  
詔陣上糧盡兵有烹子而食者猶日出苦戰益王遣使  
以少保左丞相召庭芝庭芝與姜才將兵東入海至泰  
州被執遂遇害死之日揚民皆泣下

庭芝與姜才同葬  
揚之梅花嶺坊額

曰雙  
忠

**明**陳瑄字彥純合肥人永樂初封平江伯督海運旣而  
宋禮治會通河成罷海運仍命瑄督漕務瑄議造淺船  
運漕自儀真瓜洲直達京輔建徐淮臨通常盈倉以節

轉輸築高郵湖隄隄內鑿渠亘四十里以通舟南北造  
梁以便行者每十里置一淺舖沿途鑿井植柳以飲芑  
戍兵牽輓者又以真揚諸港潮入泥淤易於淺滯請著  
爲令三年起江南北丁夫大濬仍歲令郡丁疏之國計  
賴以不匱凡所規畫精密宏遠足爲永利瑄善任使均  
勞逸雖建百世之功而秋毫不擾於民卒謚恭襄廟食  
淮徐間

蔣瑶字粹卿歸安人弘治進士正德時知揚州武宗南  
巡中官吳經馳至揚擇甲第以駐蹕大索嫠婦處女閉  
諸尼寺以金贖乃得歸比駕至瑶供御取具無所贈遺

## 江都縣志

### 卷之十四

名宦

七

諸嬖幸皆怒江彬閉瑶空舍挫辱之會帝漁獲一巨魚  
戲言直五百金彬卽畀瑶責其直瑶懷其妻簪珥袿服  
以進曰庫無錢臣所有惟此帝笑而遣之府故有瓊花  
觀詔取瓊花瑶言自宋徽欽北狩此花已絕今無以獻  
又傳旨徵異物瑶具對非揚產帝曰苧白布亦非揚產  
耶瑶不得已爲獻五百疋當是時權幸以揚繁華要求  
無所不至微瑶民且重困駕旋瑶扈至寶應中官邱得  
用鐵鉅繫瑶數日始釋竟扈至臨清而返揚人見瑶無  
不感泣瑶初至揚州時值歲饑卽請留漕米萬石以賑  
民獲甦瑶聽訟不務深文多諭遣心折而去子弟有欲

取堂上幅紙爲文者瑤曰不可出錢別市紙供之遷陝西參政夫婦覓輕舸載原攜二衣橐以行百姓出貲建祠祀之後歷官至工部尚書諡恭簡

馬晨河南新蔡人貢士萬歷庚辰任江都學教諭淹洽古今與諸生講說文義或對客論時務刺刺不肯休客起輒遮止之署如臯令有能名百姓請留不果陞陝西延安府教授辭不行曰兒子業荒將歸課之仲子化龍以壬辰登進士第歷官浙江參政贈晨如其官

楊洵字暉吉山東濟寧人進士萬歷二十六年知揚州爲清白吏第一時瓜洲稅使肆虐商民猝闕聚至千人

## 江都縣志

### 卷之十四

名宦

八

嘗侮稅使擊斃其爪牙洵至諭以數語衆立解散揚營兵及瀕江屯戍餉數萬金取自府帑例豐入齎出洵革之出入如一關崇雅書院躬自訓士與往復辯難不倦二十九年遷揚州備兵副使尋叅藩吳中

張文輝梁谿人江都學博後歷官廣西桂林府知府舊志無傳其事跡亦無考

王象晉字康宇山東新城人進士崇禎間揚州兵備副使適奸剪慝十城憚其風采時巨盜王虎子嘯聚海濱剽掠殺人象晉親掃其穴又有陳三漢等出沒波濤謀不軌象晉設方畧擒斬以狗暇則與諸生談文亶亶不

倦持已清介圖書而外泊然一無嗜好遷蘇松糧儲參政

鄭二陽字潛菴河南鄆陵人進士崇禎八年以僉事備兵維揚理繁劇如遊刃九年流寇焚鳳陽陵寢江北震動二陽簡練士卒戰守之具咸備寇再躡滁州陷和含而揚無烽火之警者皆其力也馭吏嚴不事苛細案無滯牘公暇卽賦詩屬文江都學宮久圯樂器廢闕葺堂廡製筍簠有枯杏重花之瑞一巨璫以覈鹽至責監司行屬謁禮二陽屹然不撓璫亦心折之鹽政日壞竈丁因甚欲爲亂二陽扁舟往撫皆流涕不敢萌異志五載

江都縣志

卷之十四

名宦

九

以茂績召對擢巡撫安廬都御史

國朝周亮工字元亮河南祥符籍江西金谿人本名進士於勝國嘗爲官矣順治二年以御史招撫兩淮尋授鹽運使請削舊餉行新鹽商困以蘇改海防兵備時地方初定多告密者亮工以鎮靜持之民獲安有黠奴告宦室謀反狀上官趣治兵掩捕之亮工偵其妄全活甚衆所至多治績康熙四十八年祀名宦

馬鳴佩其先登州蓬萊人後占籍遼陽左衛從 龍定

中原順治十二年以兵部尚書總督兩江精明果斷獎廉懲貪靖山海巨寇釋善良之纍繫者功德甚偉史稱

爲開國名臣子雄鎮巡撫廣西死逆藩吳三桂之亂暴尸四十日顏色如生妻妾子女及僕從之從死者凡二十八人贈太子少保諡文毅家蓋世篤忠貞云康熙五十二年祀通省郡邑名宦

王士徵字貽上號阮亭山東新城人乙未進士順治十七年授揚州府推官士徵文藻瞻麗夙負盛名居官公正嚴肅不畏強禦於疑讞重獄據案立決株連者立釋之暇則令吏執筆侍已側發言成詠俄頃可數十章遠近推爲風雅之宗秩滿陞禮部主事尋改翰林歷官至左都御史刑部尚書所著有帶經堂全集版鏤於揚購

江都縣志

卷之十四

名宦

十

得之者珍如拱璧康熙五十二年祀名宦

于成龍字北溟山西永寧人康熙二十年總督兩江嚴絕苞苴於陋規革除殆盡貪墨之吏望風斂戢豪猾者皆惴惴革心遠近肅然與民禁約要政一曰設保甲一曰禁輕生一曰嚴假旗一曰斷打降所下教令叮嚀欸曲出於至誠宛如家人浹談不爲文飾見者咸警悚或歎息泣下性惡奢靡平居布衣蔬食以身率下東南浮華之習一時丕變焉尤重文學於揚州立虹橋書院徵良士誦習其中資以膏火課訓諄摯沐其教者多能取高第爲名儒及卒於位橐不名一錢士民巷哭者屢月

爲立廟金陵長千里康熙四十六年祀通省郡邑名宦  
崔華字蓮生直隸平山人順治己亥進士康熙十九年  
由開化令超擢知揚州慈以愛民明以察吏時州邑多  
罹水患於災黎撫綏尤至守郡歷三年不赫赫於張弛  
而百度無不就理修府志葺學宮更能急所先務焉陞  
兩淮鹽運使裕課有經商受其賜者甚大遷陝西涼莊  
道參政未行而卒兩淮爲立專祠康熙三十三年祀名  
宦

熊開楚字友文湖廣石首人康熙己未進士二十四年  
尹江都達於吏治催科立便民易知由單吏胥不得上

江都縣志

卷之十四

名宦

十一

下其手除漕糧包攬之弊民得省費自輸訟獄盈庭而  
剖決如流水間以恢諧出之蓋其才大游有餘刃也他  
如賑災荒掩胔骼爲貧民贖已鬻之子女惠政尤不勝  
數在任歷八年行取候陞以望誤復補直隸新安縣尋  
卒於官有因公虧空之帑項數千金上官請循例追其  
家

聖祖仁皇帝

特降諭旨熊開楚清官盡予豁免誠異數也康熙三十五年

祀名宦

傅臘塔滿洲人康熙三十一年總督兩江清廉明決一

切文武吏治地方利弊無不洞 興革釐剔曾不緩以  
須臾懲貪墨鋤豪猾風裁凜然然務持大體不事苛察  
部內恒若無事每巡行郡邑遇小民疾苦輒親爲諮詢  
往復如家人騶從簡約見者不知爲制府也庚午以兼  
攝巡撫事監臨棘闈擴貢院增號舍供億之物皆手自  
校理多士尤謳思之卒於位道塗悉迸淚失聲會城民  
爲塋像祀雨花臺歷數十年後過者猶瞻拜欷歔不能  
已康熙三十三年祀通省郡邑名宦後奉

旨入賢良祠

許汝霖字時菴浙江海寧人壬戌進士素負海內名學

江都縣志

卷之十四

名宦

十一

者宗之其造士江南也障狂瀾裁僞體刮垢磨光風氣  
爲之大振每按校則寒峻畢登宿儒在列爲所拔識者  
率多芥拾青紫得人無如其盛後主癸未會闈藻鑑之  
譽尤著歷官至禮部尚書引年而歸人謂其不愧古大  
臣進退歸時唯載書八車出國門觀者咸歎羨之  
本朝淵博名臣熊賜履外卽首推焉康熙六十年祀名宦  
范承勲字蘇公奉天人文程公承謨弟家世忠貞以兵  
部尚書節制兩江清廉鎮靜不假聲色而吏民奉法惟  
謹遠近仰之爲景星慶雲念淮揚下河屢被水患保固  
周密而賑恤之者備至全活尤衆還

朝後士民謳思不能忘康熙五十六年祀通省郡邑名宦  
施世綸字潯江福建人滿洲籍康熙二十八年由泰州  
知州擢知揚州府持已剛正門無私謁聽訟尤敏決多  
年疑案能立剖之務抑勢力以伸小民境內無或有敢  
逞其薰灼者他如嚴保甲裁冗費減房租禁婦女入寺  
善政甚夥累遷至漕運總督雍正元年祀名宦

張榕端字子大號樸園河南磁州人康熙丙辰進士以  
內閣學士視學江南榕端素有精鑒之目韞玉含珠悉  
能剖而出之其品題無不洽於衆意試牘歷數十年士  
林猶珍如拱璧言學使之知文者必爲首屈一指康熙

江都縣志

卷之十四

名宦

十三

六十年祀名宦

張泰交字泊谷山西陽城人壬戌進士由太僕寺少卿  
以清望視學江南矢公造士嚴嶽立之操以杜奔競僥  
倖之門孤寒爲之吐氣衡校必手自裁定深夜猶不告  
勞兩目恒瘡素殫心理學每舉儒先宗旨爲多士反覆  
發明謂必道弼於中而後褻之藝者全體用也晉浙江  
巡撫政事皆本原經術累官至刑部尚書康熙四十五  
年祀名宦

郎廷極字紫衡奉天人由江西巡撫晉總督漕運輸輓  
有方天府神倉得以及時充裕丁衛不得試其奸而令

絕煩苛亦多陰受其賜遷兩江制府中正和平得古大臣經世之要性儒雅好文博古尤喜汲引後進對之者如披春風有忘其爲鎖鑰重臣也康熙五十五年祀名宦

張元臣字懋齋貴州銅仁人康熙丁丑進士視學江南衡文以先正爲宗力屏蕪縟之習所取士皆一時名雋有冰壺水鏡之譽未終任以母憂去人咸惜之康熙五十九年祀名宦

曹寅字棟亭滿洲人洽聞彊記讀書能摭華尋根詩尤精粹時商邱宋牧仲犖撫循三吳寅與之建幟騷壇名

江都縣志

卷之十四

名宦

十四

譽相埒東南才士咸樂遊其門視鹺兩淮閱歲一更歷四任而善政頗著商民多謳思之康熙五十二年祀名宦

余正健字惕齋福建古田人康熙丙子解元丁丑成進士仕京杜門却掃唯讀書勤館課絕不以詞林故習相矜尚陟國子祭酒四方之執業太學者舉慶得師視學江南抑奔競正文體講道論藝粹然儒者公明之譽尤著遷順天府尹多惠政具瞻之範集焉無何罷位世咸惜其未竟大用云康熙五十七年祀名宦

張伯行字孝先河南儀封人康熙乙丑進士歷江蘇巡

撫清正廉潔苞苴不行吏民咸畏戴之除州邑浮稅軫恤揚屬下河災民尤至於吳門建紫陽書院延名儒講論關閩濂洛之旨以正學爲己任康熙辛卯因會勘科場事駐揚州持論不阿與總督噶禮互相劾奏解任後杜門絕客粗糲自給揚民以簞食餽者盡卻之繼奉旨張伯行天下清官復其任罷噶禮萬民歡呼焚香載道踰年擢戶部倉場侍郎晉禮部尚書卒諡清恪乾隆四年祀名宦

陳鵬年字滄洲湖廣湘潭人康熙辛未進士初知山陽縣陞海州牧歷守江寧蘇州二府署藩篆皆有異績繼

江都縣志

卷之十四

名宦

十五

以誣劾罷職留京充纂修官康熙六十年起署河道總督周視諸河防舉修圯廢按行揚郡細審上下河情形議疏通蓄洩之法將以爲萬世利工未及興會河南武陟隄決力疾馳往尋卒鵬年負時望尤好誘掖後進士類多感頌之雍正元年加兵部尚書諡勤恪雍正二年祀名宦後奉

旨人賢良祠

宦蹟表著者共一百七十有八人

漢趙苞字威豪甘陵東武城人初仕州郡舉孝廉再遷廣陵令視事三年政教清明郡表其狀遷遼西太守封

郇侯

馬棱字伯威扶風茂陵人章和初遷廣陵太守時穀貴民饑奏罷鹽官以利百姓振貧羸薄賦稅興復陂湖溉田二萬餘頃吏民刻石頌之

荀曇字元智漢末爲廣陵太守時宦寺擅權曇志欲除之其黨至郡纖罪必治畧無避忌用是坐黨禁錮廢終身

陸稠字伯羸爲廣陵太守有威惠奸吏斂手郡中諺曰解理結煩我國陸君

張超東平壽張人初平元年爲廣陵太守值董卓擅政

江都縣志

卷之十四

名宦

十六

郡功曹臧洪說超曰明府歷世受恩兄弟並據大郡王室將危此誠天下義烈報恩效命之秋也今郡境尚全吏民殷富若除國賊爲天下倡義之大者也超然其言與兄邈及兗州刺史劉岱等歃血而盟起兵討賊

晉周玘揚州秀才令江都太安初石冰之亂玘同前南平內史王矩吳興內史顧秘助廣陵度支陳敏討平之後敏以廣陵相據江東叛玘復同顧榮合兵誅之時懷

帝永嘉元年也

按晉書止載玘討石冰之亂不言爲江都令舊志不知何據

徐寧東海剡人少知名爲輿縣令時廷尉桓彝稱有人倫鑒識嘗去職至廣陵尋親舊還遇風停浦中累日憂

悒因上岸見一室宇有似廡署訪之云是輿縣爨乃造之寧清惠博涉相遇欣然因留數夕爨大賞之結交而別至都謂庾亮曰吾爲卿得一佳吏部郎亮問所在爨卽叙之尋遷吏部郎左將軍江州刺史

郗鑒字道徽高平金鄉人明帝時以尚書令遷車騎將軍都督徐兗青三州軍事假節鎮廣陵咸和初蘇峻反鑒去賊密邇城孤糧絕流涕設盟登壇慷慨三軍爭爲用命及陶侃爲盟主進鑒都督揚州八郡軍事鑒率衆渡江峻平拜司空加侍中封南昌縣公

卞壺字望之濟陰宛句人父粹爲侍中立朝正色長沙

## 江都縣志

### 卷之十四

名宦

十七

王乂忌而害之壺依妻兄徐州刺史裴盾盾以壺行廣陵相累官光祿大夫加散騎常侍咸和三年蘇峻稱兵犯闕壺力疾苦戰死之二子眇眇同時遇害峻平詔贈侍中驃騎將軍開府儀同三司諡曰忠貞祠以太牢謝安字安石陽夏人太元中累官侍中都督揚豫徐兗青五州諸軍事秦符堅率衆號百萬次於淮肥京師震恐安舉從子玄帥師拒之大敗堅於淝水進拜安太保出鎮廣陵築壘曰新城以壯保障時城北湖水每漲輒沒民田安築平水埭隨時蓄洩歲用豐稔後人追思之名爲召伯埭云

謝玄字幼度安從子太元初符堅彊盛邊境數被侵寇  
朝廷求文武良將可以鎮禦北方者安乃以玄應舉拜  
建武將軍兗州刺史領廣陵相監江北諸軍事堅將句  
難等攻淮南玄自廣陵西討與賊大戰破之難等僅以  
身免玄還鎮廣陵以功封東興縣侯及符堅大舉入寇  
玄先遣廣陵相劉牢之以五千人直指洛澗擒其將旣  
而玄與堅決戰淝水南堅中流矢衆奔潰論功進封康  
樂公

孔衍魯人孔子後避地江東元帝時爲廣陵太守時郡  
接西寇政務劇冗衍猶教誘後進不以戎務廢業

江都縣志

卷之十四

名宦

十八

蔡濟令興縣時大旱濟乃剝臂然香率衆懇禱甘澍隨  
降一邑霑足

袁瓌字山甫陳郡陽夏人瓌與弟猷奉母避亂求爲江  
淮間縣拜呂令轉江都因渡江猷字申甫少與瓌齊名  
代瓌爲呂令復相繼爲江都兄弟列宰名邑論者美之

**宋**徐湛之字孝源東海剡人元嘉二十四年出爲前軍  
將軍南兗州刺史善於爲政威惠並行廣陵城舊有高  
樓湛之更加修整南望鍾山城北有陂澤水物豐盛湛  
之更起風亭月觀吹臺琴室果竹繁茂花藥成行招集  
文士盡遊玩之適一時之盛也

沈慶之字弘先吳興武康人大明三年竟陵王誕據廣陵反帝使慶之持節都督南兗徐兗三州諸軍事率衆討之誕遣慶之宗人沈道愍齎書說慶之餉以玉環刀慶之遣道愍反數以罪惡慶之至城下誕登樓謂之曰沈君白首之年何爲來慶之曰朝廷以君狂愚不足勞少壯故使僕來耳慶之營洛橋西焚其東門塞壅造攻道立行樓土山并諸攻具時夏雨不得攻城誕餉慶之食提挈者百餘人慶之悉焚之誕於城上授函表倩慶之爲送慶之曰我奉詔討賊不得爲汝送表每攻城輒身先士卒上戒之曰卿爲統任當令處分有方何蒙楯

江都縣志

卷之十四

名宦

十九

城下身受矢石耶自四月至七月乃克誕斬之進慶之司空尋爲侍中太尉卒諡曰襄

賀弼字仲輔會稽山陰人有文才大明中爲竟陵王誕記室參軍誕據廣陵反弼固諫再三誕怒抽刃向之及沈慶之討誕誕兵屢敗或勸弼出降弼曰公舉兵向朝廷此事旣不可從荷公厚恩又義無違背唯當死明心耳乃服藥自殺贈車騎將軍山陽海陵二郡太守

**南齊**裴昭明河東聞喜人少傳儒史之業建武初爲廣陵太守明帝以其無所啟奏代還昭明日臣不欲競執關鍵故耳昭明歷郡皆有勤績常謂人曰人生何事須

蓄聚一身之外亦復何須子孫若不才我聚彼散若能自立則不如一經故終身不治產業

陸慧曉字叔明吳郡吳人建武中爲五兵尚書遷南兗州刺史慧曉清介正立不雜交遊張緒稱之曰江東裴樂

梁蕭景字子昭武帝從父弟天監中爲南兗州刺史加侍中詔以安右將軍監揚州景清恪有威裁明解吏職文案無擁有田舍老姥嘗訴得景符還至縣縣吏未卽發姥語曰蕭監州符火爇汝手何敢留之其爲人所畏敬如此會年荒計口賑恤又爲饘粥於路以飼之死者

### 江都縣志

### 卷之十四

名宦

二十

給棺具人甚賴焉

蕭績字世謹武帝第四子天監十七年以南康郡王出爲南兗州刺史在州著稱詔徵還民曹嘉樂等三百七十人詣闕上表稱績功德一十五條乞留州任優詔許之進號北中郎將

霍雋廣陵令邵陵王綸率衆討侯景敗績綸奔京口賊獲霍雋等來送城下徇之逼云已擒邵陵王雋獨云王小小失利已全軍還京口城中但堅守援軍尋至賊以刀毆之雋言辭顏色如舊景義而釋之

祖皓易州人大同中爲江都令侯景陷臺城皓起兵於

廣陵斬景刺史董紹先推前太子舍人蕭勔爲刺史又結魏人爲援馳檄遠近將以討景景聞之大懼卽口率侯子鑿等出京口水陸並進皓嬰城拒守景攻城陷之車裂皓以徇

劉詢廣陵令封山侯正表叛襲廣陵兗州刺史南康王會理使詢夜襲破之收其兵糧歸就會理同入援

隋馮慈明字無佚信都長樂人大業十三年攝江都郡丞事詔令慈明安集灑洛爲李密黨所執密延坐謂曰隋祚已盡區宇鼎沸今欲率四方之衆問罪於江都卿以爲何如慈明日不義之言非所當對潛使人奉表江

江都縣志

卷之十四

名宦

二十一

都及致書東郡留守論賊形勢密知其狀義而釋之出至營門賊帥翟讓亂刀斬之時年六十八贈柱國戶部尚書昌黎郡公諡曰壯武

張惠紹江陽長大業末司馬德勣將爲亂惠紹夜馳告裴蘊謀欲矯詔發郭下兵盡收逆黨宇文化及等議已定遣報虞世基世基疑反者不實抑其計須臾難作沈光字總持吳興人少驍捷善戲馬略綜書記大業中爲折衝郎將江都之難宇文化及以光驍勇令其總統營於禁內光自以荷恩深重將爲帝復讐潛構麥孟才錢傑等陰圖化及孟才爲將軍領江淮之衆數千人期

以晨起襲化及光語洩化及大懼夜與腹心走出營外遣司馬德勣等領兵逮捕孟才光聞營內誼聲知事發不及披甲卽襲化及營空無所獲值舍人元敏數而斬之遇德戡兵入四面圍合光大呼潰圍斬首數十級賊皆披靡德戡復遣騎持弓弩翼而射之光身無甲冑遂爲所害麾下數百人皆鬪死一無降者時年二十八壯士聞之莫不隕涕

唐李襲譽字茂實隴西狄道人通敏有識度高祖初擢揚州大都督府長史江南巡察大使多所黜陟揚州江吳大都會俗喜商賈不事農襲譽爲引雷陂水築句城

江都縣志

卷之十四

名宦

二十一

塘溉田八百頃以盡地利民歸本業召爲大府卿罷揚州載書數車嘗謂子孫曰吾性不喜財遂至糞乏然負京有賜田十頃能耕之足以食河內千樹桑事之可以衣江都書力讀可進求宦吾歿後能勤此無資於人矣姚崇字元之陝州硤石人累遷中書令以言事貶申州刺史移徐潞二州遷揚州長史政條簡肅人爲紀德於碑崇長吏道處決無淹思三爲宰相封梁公諡文獻第五琦字禹珪京兆長安人少以吏幹進能言強國富民術至德初謁肅宗於彭原言今之急務在賦賦所出以江淮爲淵若假臣一職請悉東南寶貨飛餉函洛惟

陛下命帝悅拜監察御史勾當江淮租庸使琦隨事趣辦人不益賦而用以饒累封扶風郡公

李吉甫字弘憲贊皇人棲筠子年少明練典故累官至檢校兵部尚書出爲淮南節度使帝爲御通化門祖道賜御餌禁方居三歲奏蠲逋租數百萬築富人固本二塘溉田且萬頃漕渠庠下不能居水乃築隄閘以防不足洩有餘名曰平津堰江淮旱有司不爲請吉甫白以時救恤帝馳道使分遣賑貸吉甫雖居外每朝廷得失輒以聞卒贈司空諡忠懿

劉晏字士安曹州南華人廣德二年爲江淮轉運租庸

江都縣志

卷之十四

名宦

二十三

常平使晏卽鹽利雇佣分吏督之隨江汴河渭所宜舊轉運船由潤州陸運至揚子斗米費錢十九晏命囊布而載以舟減錢十五由揚州距河陰斗米費錢百二十晏爲歇艍支江船二千艘每船受千斛十船爲綱每綱二百人篙工五十人自揚州遣將部送至河陰上三門號上門填闕船米斗減錢九十調巴蜀襄漢麻棗竹篠爲綯挽舟以朽索腐材代薪物無棄者未數年人人習河險歲轉粟百一十萬石無升斗沉溺輕貨自揚子至汴州每馱費錢二千至是減九百歲省十餘萬緡晏始於揚子造轉運船每一船破錢千貫或譏其妄費晏曰

大國不可以小道理凡所創造須謀經久迺於揚子縣置十船場差專知官十人不數年間皆致富贍凡五十餘年船無破敗餽運亦不闕絕晏理鹽鐵惟置官於出鹽之鄉取鹽戶所煮鹽鬻於商任其所之不出鹽州縣不復置官曰官多則民擾其始江淮鹽利不過四十萬緡季年六百餘萬緡末年更逾十倍而人不厭苦古今稱善理財獨歸晏云

蘇瓌字昌容京兆武功人弱冠本州舉進士累遷揚州大都督府長史揚州地當衝要多富商大賈珠翠珍怪之產前長史皆致之數萬唯瓌單身而去

## 江都縣志

### 卷之十四

名宦

### 二十四

杜亞字次公京兆人興元初爲淮南節度觀察使時揚州官河填淤漕輓湮塞又僑寄衣冠及工商等多侵衢造宅行旅擁滯亞乃開拓疎啟公私悅賴

杜佑字君卿京兆萬年人以工部郎中歷官尚書右丞出爲淮南節度使佑決雷陂以廣灌溉斥海濱地爲田積米至五十萬斛列營三十區士馬整飭四隣畏之佑精於吏職爲治不瞰察數幹計賦相民利病而上下之議者稱佑制行無闕拜光祿大夫卒諡安簡佑廣劉秩政典爲通典二百篇儒者服其書約而詳

李珣字待價其先出趙郡客居淮陰累官至吏部尚書

出爲淮南節度使時江淮旱珏發倉廩賑流民以軍儲  
羨殺半價與人及疾亟官屬見臥內惟以州有稅酒直  
而神策軍爲豪商占利方論奏未見報爲恨一不及家  
事珏性寡欲門無餽餉淮南人德之立碑刻其遺愛卒  
贈司空諡貞穆

張延賞蒲州人爲淮南節度使歲旱民遷入他境吏禁  
之延賞曰食者人恃以活吾不能贍其生奈何禁其就  
食乎乃具舟遣之勅吏爲修室廬寬逋責歸者更增於  
舊瓜步舟艫輻輳而遙隸江南延賞請改屬揚州於是  
行無阻滯

江都縣志

卷之十四

名宦

二十五

杜牧字牧之京兆人牛僧孺鎮揚州牧爲書記剛直有  
奇節不爲齷齪小謹敢論列大事指陳利病尤切

杜悰卽佑子爲淮南節度使武宗聞揚州娼女善酒令  
勅監軍選十八人以獻監軍請悰同選悰曰監軍自受  
勅不敢預聞監軍怒具奏其狀武宗曰杜悰得大臣體  
朕甚愧之勅勿選

康令失其名亦不知何許人咸通中爲江陽令時大旱  
令以身代犧牲赴水死天卽大雨民悲懷之爲立康令  
祠

五代韓令坤磁州武安人少隸周祖帳下積功至都指

揮定武軍節度使世宗親征淮南聞揚州無備遣令坤等馳襲之令坤撫輯有條民皆安堵卽以令坤知州事顯德五年世宗復幸淮右揚州城爲吳人所毀詔發丁壯築新城命令坤爲修城都部署能程功而不勞民向拱字星民懷州河內人周顯德二年世宗親征淮南以拱權東京留守時揚州初平南唐出師境上謀收復韓令坤有棄城意世宗驛召拱赴行在拜淮南節度兼緣江招討使以令坤爲副時周師久駐淮揚都將趙晁白廷遇等驕恣橫暴惟務貪濫至有劫人妻女者拱至戮其不奉法者數輩軍中肅然時周師圍壽春經年未

江都縣志

卷之十四

名宦

二十六

下江淮草寇充斥吳立兵柵於紫金山與城中烽火相應而舒蘄和泰復爲吳人所據拱上言欲且徙揚州之師併力攻壽春俟城下改圖進取世宗從之拱乃封庫付揚州主者遣牙將分部按巡城中秋毫不犯軍民感悅及師行有負糗糧以送者至壽春改淮南道招討都

監

李重進其先滄州人周太祖之甥也生於太原歷官至歸德軍節度恭帝嗣位加檢校太尉改淮南道節度宋太祖受禪重進治城隍繕兵甲以拒命太祖親征次大儀鎮徑至城下卽日拔之重進舉族自焚死

宋李處耘潞州上黨人宋太祖討李重進爲行營兵馬都監重進平以處耘知揚州大兵之後境內凋敝處耘勤於綏撫奏減城中居民屋稅民皆悅服建隆三年詔歸京師老幼遮道涕泣累日不得去

王禹偁字元之鉅野人至道間知揚州眞宗卽位詔求直言禹偁上五事疏奏召還復知制誥咸平三年在黃州奏疏曰江淮大患有三城池墮圯一也兵仗不完二也軍不服習三也望陛下特許江淮諸郡酌民戶衆寡城池大小並置守捉軍士多不過五百人閱習弓劍然後漸葺城壁繕完甲冑則郡國有禦武之備矣上嘉納

## 江都縣志

### 卷之十四

名宦

二十七

之子嘉言後以進士第爲江都簿

許逖大中祥符二年知揚州郡中仕宦子弟出入里巷不爲法逖捕其甚者笞之皆羞愧就學問風俗大化

杜衍字世昌山陰人少苦志厲搯尤篤於學擢進士甲科補揚州觀察推官後知揚州章獻太后遣使安撫淮南使旋未及他語輒問杜衍安否使者以治狀對太后歎曰吾知之久矣衍爲治謹密不以威刑督吏然吏民亦憚其清整不敢爲奸後入相封祁國公諡正獻

盛度字公量餘杭人以右諫議大夫知揚州遷端明學士以尚書右丞罷復知揚州度簡重少許可甄拔人才

精於藻鑑有蘇某者客遊抵揚作書上度覽而器之曰君才宜應制科蘇以養親爲難度曰吾有租八百斛可成君之志且力爲延譽蘇遂登高第官至參政又有建州司戶參軍夏有章者授鄭州推官謁度度稱其才特置酒餞之有章爲詩以謝度得詩不發封還之通判刁繹疑而問度度曰吾始謂其遠器及閱詩封乃自稱新圃田從事得一幕職而氣已輕將止於是矣後卒如其言度終少傅太子太保諡文肅

鍾離瑾子公瑜廬州合肥人舉進士歷江淮制置發運使時殿直王乙請自揚州召伯埭至瓜洲濬河百二十

江都縣志

卷之十四

名宦

二十八

里以廢二埭詔瑾規度以工大不可就止置插召伯埭人以爲利瑾後爲龍圖閣待制

王鼎字鼎臣大名館陶人仁宗時以進士第累遷淮南等處制置發運使前使者多漁市南物因奏計京師貽權貴鼎一無所市獨悉心精吏事事無大小必出於已凡調發綱吏度漕路遠近定先後爲成法於是勞逸均吏不能爲重輕先是官舟禁私載舟兵無以自給盡盜官米爲姦有居販自贍者市人持以法不償所逋鼎爲移州縣督償之舟人有以自給不爲姦而運米未嘗不足入爲三司鹽鐵副使終天章閣待制

范仲淹字希文蘇州吳縣人舉進士嘗監泰州西溪鹽稅遷右司諫時歲大旱蝗江淮滋甚仲淹請遣使撫循未報迺請問曰宮掖中半日不食當何如帝惻然因命仲淹安撫江淮所至開倉賑之後除參知政事會王倫寇淮南州縣有不能守者朝廷欲按誅之仲淹曰平時諱言武備寇至而專責守臣死事可乎守令皆得不誅以資政殿學士遷戶部侍郎卒贈兵部尚書諡文正馮京字當時江夏人自鄉舉禮部以至廷試皆第一仁宗時以龍圖閣待制知揚州京爲郡守諸縣公事至卽歷究之苟與縣牘合而處斷麗於法者呼法吏決罪不

江都縣志

卷之十四

名宦

二十九

以付獄報下捷疾一無壅滯人服其敏後以太子少師致仕卒贈司徒諡文簡

王觀字通叟如臯人登嘉祐二年進士令江都嘗上揚州賦賜緋魚銀章

王素字仲儀莘縣人太尉旦子以進士歷官淮南郡轉運按察使時新置按察類多以苛爲明素獨不撻細故卽有貪刻必繩治窮竟以故下吏愛而畏之熙寧間進銀臺司轉工部尚書致仕諡懿敏

范端字思道江州德化人仁宗時爲江都令歲旱知揚州張若谷遣端與他吏視民田他吏白歲善端獨白田

實旱若谷疑之端持旱苗力爭乃卒從所白吳遵路蔣堂爲淮南轉運使使端護河役端往視還言河不可爲遂罷端用他吏而河果不可爲三人乃共薦端歷官至尚書庫部員外郎知臨江軍事卒於位

鮮于侁字子駿閬州人舉進士元豐二年召對命知揚州神宗曰廣陵重鎮久不得人今朕自選卿往宜善治之司馬光嘗謂蘇軾曰子駿一路福星也安得百子駿布之天下乎侁在揚命教授馬希孟探索境內簡帙作揚州集後除集賢殿修撰

呂公著字晦叔壽州人夷簡子元豐間知揚州在郡勤

## 江都縣志

### 卷之十四

名宦

三十

勵未明而起秉燭視牘雖燕居必齋時接賔僚尤詳聽覽小吏賤胥咸得輸其情理官有繫重囚而置酒宴會者公著遣吏諭之皆悔懼由是上下咸修其職轉運司輦乳香萬觔配賣郡中悉停之郡庫不爲強配民尤德之元祐中入相封申國公諡正獻

鄒浩字志完常州晉陵人第進士調揚州教授倡明正學士服其化刻沈适夢溪筆談於郡齋時呂公著守揚州甚加禮遇後公著被召首薦之歷官兵吏二部侍郎寶文閣待制

劉敞字原父臨江新喻人舉慶歷廷試第一元祐初知

揚州揚之雷塘漢雷陂也舊爲民田其後官取瀦水而不償以他田民皆失業然塘亦破決不可漕官復用爲田敞據塘舊券悉用還民發運使爭之敞不從其在郡論囚察寃人尤相傳爲神明後以集賢院學士判南京御史臺卒

張緯字伯成吳人提點淮南東路刑獄權知揚州事時方鑄崇寧大錢行新鈔法小錢舊鈔盡廢百姓皇皇商賈有自殺者緯上言錢法誤民請如舊以示大信蔡京怒罷緯初緯父染教子極嚴故緯與弟綜皆有文名并善政云

江都縣志

卷之十四

名宦

三十一

劉蒙政和六年通判揚州時江淮諸郡民苦水患流移四出泰州高郵至三千餘人轉聚於揚蒙曲加賑恤咸得不死事聞上特遷一官旌之

陳邁字亨伯永州人登進士第徽宗時歷淮南轉運使時方督綱餉運渠壅澀邁請決句城陳公兩塘達於渠漕路甫通而朱勔花石綱塞道官舟不得行邁捕繫其人而上章自劾帝爲黥勔人進邁徽猷閣待制欽宗立加資政殿學士徙知中山府爲步將沙振所害金人入見其屍曰南朝忠臣也斂而葬之鐵柱寺建炎初贈特進

向子諲字伯恭臨江人宣和初除江淮發運司主管文字時淮南歲旱漕不通有欲濬河與江淮平者內侍主其議無敢可否發運司檄子諲行子諲言自江至淮數百里河高淮數丈而欲濬之使平決不可曩有司三日一啟聞復作澳儲水故水不乏比年行直達之法加以應奉往來啟閉無節堰閘率不存今復故制嚴禁約則無患使者用其言漕復通進秩一等累官徽猷閣直學士

許份字子大閩人初任揚州兼淮東兵鈐靖康初復任上召諭揚州古名郡今委卿剷除宿弊份因請曰臣聞

## 江都縣志

### 卷之十四

名宦

三十一

應奉司封記花竹凡山林之勝士民之居騷然無復遺地願速罷去又言揚一都會而江都天長不足以供經費帥臣又於經賦外增上供窮民不堪願如政和三年舊額皆從之金人再入寇份即日檄兵勤王以解亳州之圍而漕糧至畿甸者不絕時諸路援兵所至多縱剽掠不聽入州城軍士病之份大啟城闈至則撫勞而去秋毫無犯揚民晏如

呂頤浩字元直樂陵人中進士第高宗卽位除知揚州車駕南幸頤浩入見進戶部尚書劇賊張遇屯金山頤浩與韓世忠喻降之建炎二年金人逼揚州車駕南渡

鎮江召從臣問去留頤浩叩頭願且留此爲江北聲援不然賊乘勢渡江事愈急矣駕幸錢塘拜江淮兩浙制置使以討苗傅劉正彥功拜尚書右僕射同平章事紹興二年出都統江淮荆浙諸軍事八年卒贈太師封秦國公謚忠穆頤浩有胆畧善鞍馬弓劍當國步艱難之際人倚之爲重

張浚字德遠漢州綿竹人中進士第建炎初高宗駐蹕揚州浚奏請無忘二帝北狩當留意中原汲汲修德救敝以振紀綱時內侍占揚州官寺奏罷止之又車駕及從人戀揚州繁聚無行意浚請降旨示不久住早措置

江都縣志

卷之十四

名宦

三十三

定居之所然後揚州免供億之擾四年以樞密院赴江上視師時兀朮擁兵十萬約日渡江決戰浚召韓世忠張俊劉光世將士見浚勇氣十倍世忠遣王愈詣兀朮約戰兀朮曰張樞密貶嶺南何得乃在此愈出浚所下文書示之兀朮色變夕遁後復爲江淮宣慰使封魏國公卒贈太師謚忠獻

韓世忠字良臣陝西延安人高宗建炎二年爲定國軍承宣使帝如揚州世忠以所部從時張遇自金山來降世忠獨入其壘曉以逆順衆悉聽命李民衆十萬亦降三年爲淮南東西路宣慰使四年金人與劉豫合兵分

道入世忠親提騎兵駐大儀伐木爲柵自斷歸路遂大  
敗之論者以爲中興武功第一而揚州則大賴其捍衛  
以安後封威安郡王孝宗朝追封蘄王諡忠武  
張績金壇人建炎中守揚州金兵進圍城高宗恐績力  
不能支許退保鎮江績堅不動弗顧其家後城潰及妻  
子皆死之  
李處端字能白邯鄲人淳熙十二年授江都令時縣廩  
殘於兵燹案牘棲列無所吏抱持歸於家朝昏赴庭遇  
雨則立濼淖中且六十年處端爲鼎新之三月落成公  
私稱便

江都縣志

卷之十四

名宦

三十四

劉錡字信叔德順軍人紹興三十一年金主亮調軍六  
十萬自將南來中外大震乃以錡爲江淮浙西制置使  
引兵屯揚州建大將旗鼓駐清河口金人以糧裹船載  
糧而來錡使善沒者鑿沉其舟退軍召伯鎮金人攻眞  
州錡引兵還揚州帥劉澤以城不可守請退軍瓜洲金  
萬戶高景山攻揚州錡遣員琦拒於皂角林陷圍力戰  
林中伏發大敗之斬景山俘數百人捷奏賜金五百兩  
銀七萬兩以犒師卒贈開府儀同三司諡武穆

魏俊

宋史  
作友

王方爲劉錡軍將後屬李橫俊爲左軍統制  
方爲後軍統制金人以重兵逼瓜洲分兵東出江臯逆

趨瓜洲橫以孤軍不能當却失其都統制印魏俊王方

死之瓜洲於其戰歿處建廟祀之

明太祖嘗感夢俊方助國詔立廟府城額

曰旌忠歲時祀之

陳俊卿字應求興化人登進士第累遷中書舍人孝宗立志在興復以俊卿忠義沈靖有謀卽本職充江淮宣撫判官興元初建都督府俊卿除禮部侍郎參贊軍務張浚請於朝出師已而兵潰俊卿退保揚州主和議者幸其敗議罷浚都督改宣撫使治揚州俊卿奏浚果不可用別屬賢將若欲責其後效降官示罰古法也今削都督重權實揚州死地人心解體尚何後効之圖上悟

### 江都縣志

### 卷之十四

名宦

三十五

復浚職俊卿後以少師魏國公致仕

莫濛字子濛湖州歸安人以祖廕補將仕郎兩魁法科仕戶部左曹郎中出知揚州陞辭上以城圯命濛增築濛至州規度城闔分授諸將各刻姓名於堞間縣重賞激勸閱數月告成上曰使任責者人人如濛天下有何事不成除直寶文閣學士大理寺少卿累遷至工部侍郎

崔與之字正子廣州人舉進士歷官金部員外郎時金南遷於汴朝議疑其進迫特授與之直寶謨閣權發遣揚州事主管淮東安撫司事寧宗宣引入內親遣之奏

選守將集民兵爲邊防第一事既至浚濠廣十有二丈  
深二丈西城濠勢低因疏塘水以限戎馬開月河置釣  
橋州城與保砦城不相屬舊築夾土城與之爲易以甃  
因滁有山林之阻創五砦結忠義民兵金人攻淮西沿  
邊之民得附山自固金人亦疑設伏自是不敢深入揚  
州兵久不練分彊勇鎮淮兩軍月以三八日習馬射令  
所部兵皆倣行之金人入境宰相連遺與之三書俾議  
和與之亟修守戰備遣精銳布要害金人深入無功而  
和議亦寢召爲秘書少監軍民遮道垂涕後以觀文殿  
大學士致仕累封至南海郡公諡清獻

江都縣志

卷之十四

名宦

三十六

余晦四明人初辟制置大使司幕官尋令江都時百務  
蝟興最繁且迫晦以一身肩之不爲所困江都迎新令  
例有公費晦謝不取以之建堂榜曰清晝云

應武天台人嘉泰間掌郡學教事課試有程基廸有方  
雖寒暑昕夕在私家絕少被其教者粹於經麗於辭多  
所成就其滿而去也諸生繪像事之

趙范字武仲蒲圻人京湖制置使方子也嘉定間通判  
揚州旋進直徽猷閣知揚州時劉全王文信二軍老幼  
留揚范欲修軍政懼其徒漏泄兵機遺徐晞稷書令二  
人挈家歸楚范厚賚以遣有孫海者其衆亦八百范併

請抽還楚州又請勅馬軍三千招游手之強壯者及籍  
牢城重役人充之別籍民爲半年兵春夏在田秋冬教  
閱官免建砮而私不廢農上書史彌遠曰揚州者國之  
北門一以統淮一以蔽江一以守運河不可無備又爲  
書告廟堂請罷調停之議專戰守紹興三年與弟葵同  
殲李全進兵部侍郎淮東安撫使兼知揚州後加吏部  
侍郎進工部尚書

趙葵字南仲范弟也寶慶元年范知揚州乞調葵以強  
勇雄邊軍五千屯寶應備賊紹定中爲淮東提點刑獄  
李全攻揚州東門葵親出搏戰賊將張友呼城門請葵

江都縣志

卷之十四

名宦

三十七

出及出全在隔濠立馬相勞苦左右欲殺全葵止之切  
責之言甚多全無以對彎弓抽矢向葵而去於是數戰  
皆捷遂殺全葵前後留揚八年墾田治兵邊備益飭入  
對帝曰卿父子兄弟宣力甚多卿在行間又能率先士  
卒捐身報國尤儒臣所難景定元年授兩淮宣撫使判  
揚州累封冀國公卒贈太傅諡忠靖

王鑑字仲明幼警敏精騎射紹定三年李全犯揚州江  
淮大使司檄鑑從趙葵往救鑑乘賊始至出迎擊之賊  
識鑑旗幟曰淮東硬軍也四年安撫使趙范戒朝食期  
翌日出兵大戰葵曰非王都統不可約鑑帥兵以往鑑

擐甲待旦躍馬至北門或以非地分勸鑑徐行鑑揮之曰同舟遇風何地分爲全適宴北使於平山堂意驕我軍鑑率單騎直前相拒纜數百步厲聲呼逆賊全汝在山東作劫賊歸宋得節度之旌乃背義孤恩昊天不庇今日當盡予手全怒奔馬戰無幾塵埃漲天范葵遣兵斷全歸路全爲鑑所敗偕十餘騎走而西至新塘墮水鑑追至左右射全與其黨皆死捷聞特授左武大夫復州團練使終京湖宣撫大使司諮議

彭方字季正江西都昌人朱子守南康受業於白鹿洞開禧中揚州教授建七賢堂祀韓忠獻公七人遷景陵

## 江都縣志

### 卷之十四

名宦

三十八

令以薦入直龍圖閣累官兵部侍郎龍圖閣直學士卒諡文定

楊文仲字時發眉州彭山人寶祐登進士第添差通判揚州舊額牙契歲爲錢四萬緡累增至十六萬開告訐以求羨文仲曰希賞以擾民吾不爲也卒如舊額制置使李庭芝檄主管機宜文字時有沙田使者欲舉行之文仲力爭以爲興利之惠有限不擾之惠無窮江北風寒之地民力竭矣爲利幾何安忍重擾吾民乎事遂寢召爲宗學博士遷太常少卿

姜才濠州人德祐時爲通州副都統賈似道軍潰元兵

乘勝攻揚州才爲三壘陣逆之三里溝戰有功又與元師戰楊子橋日暮兵亂流矢貫才肩才拔矢揮刀而前所向辟易已而元軍築長圍自楊子橋竟瓜洲東北跨灣頭至黃塘西北至丁村務欲以久困之有舍人持謝太后詔來諭才發弩射卻之瀛國公至瓜洲才與李庭芝涕泣誓將士出奪之將士皆感泣以四萬人夜擣瓜洲戰三時衆擁瀛國公避去才進戰至浦子市夜猶不退元阿朮使人招之才曰吾寧死豈作降將軍邪四月才以兵攻灣頭柵五月復攻之騎旋濘而止乃舍騎步戰至四鼓全師以歸六月護餉至馬家渡萬戶史弼將

江都縣志

卷之十四

名宦

三十九

兵擊奪之才與戰達旦弼幾殆阿朮馳兵來援乃得免去才與庭芝東至泰州阿朮追及使使者招之降才不聽阿朮驅揚兵士妻子至城下會才疽發脅不能戰諸將遂開門降入才臥內執之以獻阿朮愛其忠勇欲降而用之才肆爲慢言阿朮怒磔之

趙淮葵之從子也李全之叛屢立戰功累官至淮東轉運使德祐中戍銀樹壩兵敗與其妾俱被執至瓜洲元帥阿朮使淮招李庭芝許以大官淮陽許諾至揚城下乃大呼曰李庭芝男子死耳毋降也元帥怒殺之棄屍江濱其妾賂軍校得焚淮屍拾骸骨抱之赴江死

陸秀夫字君實楚州鹽城人景定元年登進士第李庭芝鎮淮南聞其名辟至幕中天下稱得士者以淮南爲第一號小朝廷秀夫才思清麗一時文人少能及之者性沉靜不苟求人知每僚吏至閤賓主交歡秀夫獨斂然無一語或時宴集府中坐尊俎間矜莊終日未嘗少有希合至察其事皆治庭芝益器之三遷至主管機宜文字咸淳十年庭芝制置淮東擢參議官德祐元年邊事急諸僚屬多亡者惟秀夫不去庭芝上其名除司農寺丞後累官至左丞相奉少帝居厓山厓山破仗劍驅妻子入海卽負少帝赴海死

江都縣志

卷之十四

名宦

四十

元史弼字君佐一名塔刺渾蠡州博野人從阿朮取揚州授昭勇大將軍揚州路總官府達魯花赤後爲淮東宣慰使凡三官揚州有惠政人喜刻石頌之號三至碑後封鄂國公年八十六卒於家

郝彬字景文霸州信安人世祖初年十六充太子宿衛擢揚州路治中宋末鄞縣賊顧潤聚衆海島時出攻剽宋羈縻以官內附後益橫侵揚州境彬討擒之揚賴以安官終大司農卿

張炤字彥明濟南人至元十三年陞大中大夫揚州路總管府達魯花赤商議行中書省事佩金虎符行省在

揚州據南北要津炤撫綏勞來上下安之卒封清河郡侯諡敬惠

胡長孺字汲仲婺州永康人至元間拜集賢修撰與宰相議不合改教授揚州元史稱其學自九經諸史下逮百氏名墨縱橫旁行敷落律令程章無不條理而揆序之長孺爲教授時誘引諸生者不倦人皆宗慕之郡二千石延講經義環聽者常數百人後移任建昌去

明張德林鳳陽人明初以功授江淮分院元帥丁酉七月繆大亨率師取揚州以其地要害置江淮翼元帥府命德林同耿再成守焉時籍江都城中居民僅存十八

江都縣志

卷之十四

名宦

四十一

家德林招集流亡威肅惠懷軍民輯睦以舊城虛曠截西南隅築而守之今揚州府城卽德林所築也

單安仁字德夫濠人元末江淮兵亂安仁集健少年數萬號青軍保障一方授院判從鎮南王孛羅普化守揚州旣而王爲長槍軍所逐安仁無所屬聞明太祖定集慶率衆歸附太祖命爲元帥歷兵部尚書致仕家居嘗奏請疏轉運河浚江都深港以防淤淺移瓜洲倉廩置楊子橋免大江風潮之患帝善其言從之後予告贈田三千畝牛七十角仍給尚書半祿終其身

又馬得嘗與安仁集義勇

軍捍其鄉後得亦歸附明太祖爲揚州衛鎮撫能和輯軍民揚人德之

繆大亨定遠人洪武初爲樞密同僉鎮揚州寬厚不擾而治軍嚴肅尤洞燭民情抑強扶弱剖決若流時市民廬舍燬無力復構大亨給木助之衆皆感悅卒於官民哀之如親喪

歐陽銘字日新泰和人洪武中以賢才薦除江都縣丞兵燹之餘民死徙者十七八銘招來拊循漸次復業民有繼母告其子不孝者呼至案前委曲開譬母子泣謝去卒以慈孝稱嘗治廨後隙地得白金百兩會部符徵漆卽市漆以輸焉遷臨淄知縣

張本字致中東阿人洪武中自國子生授江都知縣釐

## 江都縣志

### 卷之十四

名宦

四十二

奸革弊豪猾斂迹靖難兵至揚州以滁泰二知州房吉田慶成率先歸附命與本並爲揚州知府偕見任知府譚友德同蒞事前人稱本廉介有執持云

王彬字文質東平人洪武中進士拜監察御史建文四年巡按江淮駐揚州北平兵至彬與鎮撫崇剛嬰城堅守時盛庸兵旣敗人無固志守將王禮謀舉城降彬執之及其黨繫獄剛出練兵彬修守具晝夜不解甲有力士能舉千斤彬常以自隨燕兵飛書城中縛王御史降者官三品左右憚力士莫敢動禮弟崇厚賂力士母誘其子出乘彬解甲浴粹縛之出禮開門納燕師彬與剛

皆不屈死福王時贈彬太僕卿諡忠莊

崇剛明初以戰功世襲揚州衛指揮沉摯善謀畫有膽氣建文時北平兵至剛與御史王彬銳意禦守勸彬躬親艱危以忠憤徹人心薦某可戰某可守某可具械某可辦餉井如也日夜練兵濬壕佐彬甚力彬被執剛亦不屈死福王時贈德清伯諡壯愍

舊志作鄧剛今據明史稿訂

周忱字恂如吉水人永樂二年進士改庶吉士宣德中用楊榮薦巡撫江南兼督稅糧始至卽奏罷淮徐等倉支米轉運之法於江都瓜洲江岸東浚二港建便民倉於港側令每年秋末蘇松等府各運米貯倉及冬初領

## 江都縣志

### 卷之十四

名宦

### 四十三

漕官軍駕船序泊瓜洲以待南京戶部差官監兌又築石堤於瓜洲南岸俾運行者不苦淖濘造巨艦江上以救顛溺忱在巡撫前後二十二年謀慮深長善採衆論致仕後民懷其德到處立生祠祀之

王竑字公度江夏人遷河州正統中以進士授給事中土木之變廷擊王振黨馬順死直聲振天下景泰二年巡撫江北適淮揚大荒諸倉皆空虛獨廣運倉尚有儲積竑欲發之主者有難意竑曰民窮至此旦夕爲盜且上憂朝廷何論備京師爾不從脫有變吾先治爾召盜罪然後自請死主者素憚其威許之所存活百五十八

萬八千餘人他境流寓安輯者萬六百餘家先是帝得  
荒奏驚曰奈何無饑死我民及閱竝報大喜曰好都御  
史成化中晉兵部尚書卒諡莊毅

王恕字宗貫三原人正統十三年進士知揚州府夙夜  
在公請謁不行事無大小寬猛惟當歲再荒發粟賑饑  
不待報作資政書院大興文教天順四年以治行最超  
遷江西右布政使後以刑部右侍郎總督河道濬高郵  
邵伯諸湖修雷公上下句城陳公四塘水閘旋改南京  
戶部左侍郎又遷副都御史巡撫江南所部水災奏免  
秋糧六十餘萬石周行賑貸全活百餘萬口後晉吏部

江都縣志

卷之十四

名宦

四十四

尚書卒贈太師諡端毅

楊璟鄧州人天順八年教諭性惇謹學務明理教以身  
先每夜課諸生誦讀仍置二生遞直鷄鳴起侍戶外候  
燈出輒隨往各齋驗諸生勤惰暇則籤召諸生背誦經  
書或講說理義歷數年如一日諸生亦競用奮起所藉  
成名甚衆人以比河汾湘湖之教焉

王勤字而勉直隸武邑人天順間知揚州府平易簡實  
愛民若恐有傷在任九年操持如一百姓咸謳頌之  
田瓊湖廣松溪人舉人成化四年任揚州教授瓊秉性  
剛嚴居常不假人以辭色始蒞揚卽以師道自重雖參

臺郡貴官惟禮無諂遇諸生恩義區別最明諸生由是奮激砥礪駸駸不懈常愛校生夏易憫其貧捐已資爲娶仍誓誠同官毋索寒士餽儀同官胥畏服

周源武昌人舉人成化七年以御史知揚州府律身嚴潔不可干以私時有訴外舅竊賣其女者舅誣服忽捕者獲女至乃幼育於舅其父潛誘賣之源歎曰刑獄必得實情可不慎哉又有兄殺其弟者獄未決人報有二鷹相擊鬪俱墮城東水內源指其處索之果獲其殺弟刀遂輸服人驚爲神有內侍扈藩王就封過郡索物不得捽源辱之民頃刻集數千人隔河大呼曰無妄辱我

江都縣志

卷之十四

名宦

四十五

公其得人心如此

李紱高平人成化間任揚州府同知潔已愛民嘗築堤復坍江田數萬頃又董開高郵康濟河挑揚州瓜洲儀徵運河當道旌保其績加四品服尋卒於官

陸愈字抑之平湖人進士成化十一年知江都縣會歲荒計口給賑貸以牛種饑民有鬻子女者捐俸贖之至數百口城西多江南屯戍有翁子正聚黨剽劫行旅愈捕獲之仍請置官橋巡檢以控制焉又鑿花園港以蓄洩水利增築邵伯湖堤以禦水患用歲辦餘錢以儲賑粟皆惠政也秩滿遷官百姓咸立碑頌之

蘇琇字彥器尉氏人弘治八年江都丞人有告以江都之俗多僞者琇曰噫是欲使我先以僞迎之耶夫以僞迎之必先覘其色覘其色而不得必又探其言探其言而不得則必鈎索其陰細以中之安有立人上而忍出此者哉無何自劾歸

王恩字克承餘姚人進士弘治間知揚州禮賢綏衆禁淫正俗歲饑懇疏得移撥商鹽截留兌運周助賑給又發在庫解京馬價銀糴米驗口給散全活甚廣後自劾專擅語甚切至竟免徵

白昂字廷望南直隸武進人進士弘治十年以工部右

江都縣志

卷之十四

名宦

四十六

侍郎兼右僉都御史治淮揚等處漕河昂素有才識奏分揚州管河通判居瓜洲使軍民有所統一又奏濬瓜洲儀徵壩口及揚州灣頭運河親往督工又以高郵湖險舟多沒溺開內河四十里以便牽挽工成賜名康濟至今利之

陳憲河南西平人正德七年知江都縣操守清介剖決無滯牒會霸州流賊齊彥名等由京口趣瓜洲勢甚猖獗憲隨事區畫爲守禦計甚備時徵調官軍數萬頓城下軍興日費不貲皆辦自公帑未嘗斂民間一錢雖羽檄旁午而閭閻晏然若不知兵者秩滿陞鎮江府通判

易瓚字廷器直隸肅寧人正德十六年知揚州府在郡勤勵詳慎四鼓卽起盥櫛坐後堂治事味爽而出案無留牘嘉靖壬午癸未連饑瓚請賑於朝先召父老詣富室勸輸預集饑氓給以三月之食繼有旨悉蠲稅糧及發太倉銀米數萬瓚憂勞區畫躬先廩給又令僚屬詣州縣分賑全活者十九萬餘人貸種三萬七千餘戶後歷任右副都御史巡撫河南

雷應龍字孟升雲南蒙化人進士授御史嘉靖五年命理兩淮鹽課見義勇爲不顧利害下令撤五司徒廟銅像改祀胡安定先生毀州縣淫祠無數械治廟祝僧道

## 江都縣志

### 卷之十四

名宦

### 四十七

之擅左道惑衆者悉抵於法人以爲不愧風憲云

劉良卿新野人嘉靖六年以進士令江都有才幹治尚嚴察吏亡得爲奸然不事苛刻民皆愛之後有曲江王維賢又有豐潤谷嶠皆起家進士其政蹟率如良卿云侯秩字季常直隸長垣人嘉靖十一年知揚州性凝重不苟言笑以勤儉率下節夫傳禁侈靡逐俳優罪諸佚游者濬陳公塘以資灌溉謂揚民無蓋藏乃多方儲粟至二十萬民以訟至府不數言而決雖重獄未嘗淹旬月也秩不媚權貴門無私謁蝗入境輒散不爲患去任後民有遺思歷遷陝西參政

范總字平甫其先江西樂平人遷瀋陽正德間進士嘉靖初伏闕爭大禮下獄廷杖由戶部郎中歷兩淮鹽運使條上鹺政十要有裨鹽法於揚民多恩澤遷四川參政遮送者塞道或念其貧懷金走數百里餽之總絲毫無所取衆咸感歎相與立祠城南官河岸肖像祀之累官至兵部尚書

吳百朋字惟錫義烏人進士嘉靖丙辰以御史出按江北會倭犯揚州百朋聞報疾馳至揚時傳賊多間諜四門皆閉止開東門之半許民入遠近扶携爭門者門爲咽百朋命大開各門納之衆譟呼徹天乃急趣士卒乘

江都縣志

卷之十四

名宦

四十八

城晝夜躬拊循之至廢寢食士卒有死行間者親哭臨之仍厚恤其家以故一時軍民爭保城櫓賊不得近而百姓賴以無恐比解嚴百朋鬚鬢俱白

吳桂芳字子實新建人進士嘉靖三十一年知揚州府初至郡有水患請發賑蠲稅百姓德之及倭寇江北桂芳募練鄉勇懸賞格以簡拔將校守禦之策無不備具爲沿海州縣築城浚隍俾民依城保聚倭至得免焚掠又採郡紳何城議以揚州鹽課當東南財賦半商人居舊城外非計請於巡按奏築新城揚州之有兩城自桂芳始桂芳才敏而事勤政績甚著有守揚疏議四卷萬

歷三年桂芳總督漕運兼巡撫鳳陽以淮揚洪潦奔流  
惟雲梯關一徑入海致海湧橫沙河流泛溢而興鹽高  
竇諸州縣所在受災請益開草灣及老黃河故道以廣  
入海之路修築高郵東西二堤以蓄湖水皆下所司議  
行歷官南京戶兵二部尚書晉工部尚書卒贈太子少  
保  
劉景韶字子成湖廣崇陽人進士任揚州兵備時倭寇  
猖獗景韶親督兵臨陣悉殲其衆上功第一陞都御史  
張景賢四川眉州人進士嘉靖三十三年以倭寇日警  
始設海防兵備副使以景賢爲之甫任倭大至擐甲督

江都縣志

卷之十四

名宦

四十九

戰重懸賞格募死士授以火攻畧一鼓殲之綜核軍政  
境內肅然暇則崇文興賢獎進後學累官至都御史  
石茂華字崇質山東益都人嘉靖三十四年知揚州府  
性簡默持大體值倭寇羽書旁午從容應之不動聲色  
而事辦登陴勞士夜不歸廨食寢與俱已而倭退前守  
吳桂芳議築外城捍環河商民報可而陞任去茂華踵  
行之召商民畫地授工備築之事皆親爲籌畫九閱月  
告成明年倭寇復來望之引去後人呼爲石城累官至  
侍郎

趙訥字孟敏山西孝義人進士嘉靖間調繁令江都警

敏有吏幹政務大體多所興革尤留意里甲先後裁縮公私諸費數百千時河隄善崩運道湮塞有議開花園港建閘以洩水者訥謂不若浚白塔河便白諸監司謂浚河工省而利博建閘費夥而事難監司韙其議從之興化故苦賦重欲分之諸邑訥獨先諸州縣吏上牒力爭言甚剴切事乃寢江都以郡附郭無志訥始採葺成縣乘焉

李遂字邦良豐城人嘉靖五年進士三十六年倭擾江北廷議請特設巡撫乃命遂以原任操江撫鳳陽四府時淮揚三創於倭歲復大水且日役民輓大木輸京師

江都縣志

卷之十四

名宦

五十

閭閻重困遂請餉增兵革軍餉所派大戶幾千家減排門鄉兵歲省民財萬計以次經畫戰守卒攻賊於廟灣盡殲之遷兵部侍郎卒贈太子太保諡襄敏

朱哀字崇晉湖廣鄖西人嘉靖中舉於鄉爲武功知縣關中有鐵漢稱遷同知揚州吏無敢索民一錢倭入犯擊敗之沙河殲其酋還所掠生口甚衆未幾倭復大至薄城東門哀督兵奮擊死焉贈左參政錄一子

方九功字允治河南南陽人進士嘉靖四十四年除知江都江都當南北孔道諸費咸取辦里中每九月爲更番後累費幾二萬餘九功爲通融參酌歲減去萬五千

所存者二十之五船馬夫頭減者十之六月夫踐更減  
三之二居江都三歲歲費省至數萬流亡者悉還業九  
功嘗語人曰余治江都無他長田畝里中稍稍稱均省  
耳第所舉者什不能二三舉而不竟姑留以俟後賢焉  
歐大任字徵伯廣東順德人嘉靖末訓導學甚該洽嫻  
古文詞貌寢越語而坦率無他腸人皆樂與之遊時博  
士業日趨靡陋大任始進諸生授之史漢文選士彬彬  
知向慕古昔談經之暇與諸生倡和爲詩號竹西社隆  
慶初奉御史檄纂世宗實錄因採廣陵賢士大夫爲十  
先生傳又有浮淮輶中二集

江都縣志

卷之十四

名宦

五十一

龔勗字克懋章邱人貢士隆慶五年訓導爲人剛介不  
妄合居平以廉耻自勵同官者稍涉阿媚輒罵之諸生  
貧者卻其餽贄所論著有理氣解辨析甚精同邑李攀  
龍講業燕中少所許可惟與許長史邦才及勗兩人耳  
後陞永平教授竟以剛介忤上官劾罷勗少爲人牧羊  
邱尉庭笞之乃憤而卒業鄉校成老宿焉

陳耀文字晦伯河南確山人進士隆慶間爲淮南兵備  
時倭甫平而境有巨猾乘亂嘯聚數千人盤據窟穴曰  
史家莊曰灰郭村曰樊汊而史家莊尤稱驍黠時入江  
劫掠商賈官軍不能制其黨有衣白衣密踰城爲謀者

有司捕械至耀文亟釋之誘以重賞令給賊弛備夜驅  
士卒銜枚搗其莊盡殲之餘黨奔潰諸村落悉安耀文  
學問淹博於書無所不窺著有天中集二百餘卷

潘季馴字時良烏程人起家進士先以僉都御史治河  
道入爲刑部侍郎萬歷五年河決全淮南徙高堰湖隄  
大壞淮揚所屬皆成巨浸大學士張居正薦季馴爲河  
漕尚書季馴以淮清河濁淮弱河強河水一斗沙居其  
六伏秋則居其八非極湍急必至停滯當藉淮之清以  
刷河之濁築高堰束淮入清口以敵河之強使二水并  
流則海口自濬遂條上六事詔如議明年冬兩河工成

江都縣志

卷之十四

名宦

五十二

加太子太保進工部尚書季馴四治河道前後二十七  
年習知地形險易增築設防置官建閘下及木石椿埽  
綜理纖悉積勞成病卒年七十有五先是泗州人訛言  
欲廢高堰季馴上疏力爭悉陳泗人廢堰陰爲私鹽私  
稅之故特立周橋石限使舟不得過恐泗人謀復隳成  
功作河防一覽條議詳悉盡善後世奉爲石畫

胥遇字際明四川眉州人進士萬歷十三年海防兵備  
道初至問疾苦知水患最困卽檄守令分勘下流海口  
壅閼則東濬三場穿范堤達苦水洋牛灣河北疏兩河  
從葫蘆港蔓糧河達新豐市入海上流湖水泛溢則闢

惠政橋引趨芒稻河南注於江受期興役次第竣工民賴其利陞雲南廉使郡人立碑記之

吳秀字平山浙江烏程人隆慶辛未進士萬歷十九年知揚州下車首請復五塘當道難之卽日解綬去民遮道呼號聞監司爲請於朝塘復其三城內市河閼淤新城西隅無濠秀挑北隅之隍引官河之水注其中浚城內河之淤者與新隍之水接闢廣儲門內建糧倉外築梅花嶺二城水相縈帶舟楫稱便會倭寇犯順秀儲穀練兵樓櫓戰具悉備吏僉報大戶以便城守秀叱止之民不擾揚舊有承值舖戶應諸司之求秀斧其碑與

江都縣志

卷之十四

名宦

五十三

民平價商賈大悅居二年郡大治晉興泉臬司去陳邦科江西高安人進士萬歷辛巳令江都丙戌以課最徵爲南監察御史邦科豈弟愛民尤精覈吏事嘉靖間趙訥方九功相繼爲政里甲繇役多所裁省旣久而弊孔復多邦科尋其廢政修之奉部檄清丈各里田畝乃分其戶爲三等九則一時徭役稱均其聽訟虛心諦警弗任喜怒治江都六年幾致刑措初廟學蕪圯邦科下車首發罰鍰二百金修葺之諸生貧者時割俸周給焉乙未由御史出爲河間知府道出揚州百姓扶携老稚瞻拜送周數十里灑涕而還繼邦科者爲劉道隆官

箴吏事亦稱最

武之望陝西臨潼人戊子舉鄉試第一明年成進士令  
霍邱萬歷十九年調繁江都之望長身玉立丰采曠人  
政和教肅士民安之事上官恭不爲阿直不爲抗鄉大  
夫書刺勅門者必露封而後進一時請托頓絕太守議  
復五塘之望贊之甚力會有撓者垂成而敗三年召爲  
吏部考功主事

趙良相湖廣衡陽人進士萬歷三十五年知揚州廉介  
有威郡有梟猾數人披猖市井良相立捕置之法樹榜  
其門終其身不敢犯課試諸生決某當大魁果以館元

江都縣志

卷之十四

名宦

五十四

登侍從時服其有知人之識

張寧字坤一襄城人進士萬歷甲午知江都聽訟率片  
言折之兩造皆欣服尤不易被人罪多從未減訟牒有  
所勾攝署其名付訟者與之期再渝始遣隸逮之及對  
簿日版其名次以召雖丙夜必竟其事以故案無滯牘  
故事諸使者行部供張繁夥悉倚辦里簷寧視不急者  
罷之曰吾不敢以吾民膏血諛人也居恒日飯脫粟餽  
遺悉卻之邑乘殘缺所增訂也陞南刑部主事

姚祚端浙江烏程人進士萬歷間江都令公恕廉敏催  
科不擾城東北隅有石人長二尺許砌市牆內黃冠詐

云有靈祈禱奔走填咽衢陌通國若狂祚端碎石人而懲倡妖者人服其正直五載政最召爲御史

李三才字道甫順天通州人萬歷二年進士以右僉都御史巡撫江北時礦稅使四出江淮騷動而奸民以礦稅多起爲盜三才疏言臣境內千里之區抽稅理鹽蘆政之使基置星列加以無賴亡命不逞奸徒假旨詐財動以萬數破產傾家十人而九請勅停止以安民生疏上不報三才自揚州移駐淮安士民攀轅者無算

余文燿四川長壽人進士萬歷末知江都性嚴重持正不阿居心坦恕不鏗急爲治每向夕端坐竟夜不寢勞

## 江都縣志

### 卷之十四

名宦

五十五

心民事仕至南大理寺卿

來復字陽伯陝西三原人進士天啟七年海防兵備道時璫勢正熾有胡劉二闖以檢括欽賊踞揚郡復弗爲禮二闖恚詈之復抗不稍挫未幾忠賢敗按二闖皆實於理復善治兵布方畧信賞必罰海上有大盜聚衆數千縱反間離其黨渠魁就殄又捐俸葺城民賴之

劉鐸江西廬陵人進士由刑部郎中知揚州有才藻憤魏忠賢亂政作詩有陰霾國事非之句書於僧扇偵者得之聞於忠賢倪文煥素銜鐸遂嗾忠賢逮治之鐸初就繫坦然不改常度揚人以縑素乞書者淋漓渾灑應

之不倦至京坐以大辟忠賢誅鐸贈太僕少卿

王徵字良甫陝西涇陽人天啟間爲揚州推官值三王之國徵求供億民不堪命徵挺身白王王爲飭戒侍衛揚境不擾魏忠賢竊柄構黃山獄連巨室數百人徵毅然曰某在必不廢法求媚以陷良善力爭之卒免數百人時建魏璫祠成徵與淮海道來復獨不往拜人稱爲關西二勁云後歸秦中遇李賊之難絕粒七日死

袁繼咸字臨侯分宜人天啟乙丑進士崇徵間揚州兵備副使獎廉抑貪鋤奸扶善郡守某受賂鬻獄繼咸發其贓罪狀胥吏强暴者折以刑境内乂安時中官楊顯

江都縣志

卷之十四

名宦

五十六

名飭理兩淮鹽務御史轉運使以下跪拜趨謁而繼咸獨不屈顯名不悅劾退之通國謹譁閉城門遮留繼咸慰諭之乃得出未幾上悔悟擢巡撫楚中

湯來賀字佐平江西南豐人進士崇徵十三年揚州推官時歲大荒來賀以米五千石及募輸之穀設廠煮粥更設醫藥以救饑民之病者仍以餘米及贖鍰購麥備來歲賑次年果復饑分坊按籍人各與麥一升復請改折漕糧民省四倍之輸漕運都御史史可法疏薦其能會中貴督鹺來揚强郡邑行屬禮來賀不從移書諸縣令曰此膝一屈不可復伸諸君但以余爲辭彼必怨我

願爲諸君獨肩之其風槩如此尋內召以忤時相僅授部主事歷官廣東廉使

歐陽蒸字憲文湖廣潛江人進士崇徵十三年知江都愷悌慈惠表裏如一糾紛盤錯而奏治晝然校士於天寧寺時童子千餘人試卷山集蒸面加披閱試訖而甲乙已定所賞拔皆成名宿人服其識

劉士璟字昆白遼東復州衛人慷慨多大畧崇徵間以明經授訓導時戎事倥偬入課生徒出佐守禦淮撫史可法奇其才命攝輿化令士璟往以所服袍帶募穀麥賑饑療疾民大悅擢沐陽令流寇突至死之贈山東按

江都縣志

卷之十四

名宦

五十七

察使司僉事賜祭葬諡忠烈

史可法字憲之一字道鄰順天大興人母尹氏有娠夢文天祥入其室生可法崇徵元年成進士累官右僉都御史巡撫安慶廬州等處奏免被災田租募壯士繕甲仗日夜爲戰守計賊避其鋒十四年以戶部右侍郎督漕運尋拜南京兵部尚書十七年四月聞李自成陷京城大慟頭觸柱血流被體縞衣發喪欲長驅死賊及福王立馬士英擁兵入可法知勢不並立請督師淮揚加太子太保兵部尚書武英殿大學士時高傑兵駐揚州被淫掠死者無算可法具疏以瓜洲城屯其衆揚州以

安可法遂開府揚州闢禮賢館招四方才智悉任用之  
屢疏請餉士英靳不發每疏請討賊復讐聲淚俱下扼  
於馬阮獲報而已次年四月左良玉東下王手書召可  
法人援即日發兵渡江抵燕子磯聞良玉已敗乃令速  
還請陞見不許還抵天長一日夜奔揚州檄召各鎮兵  
無一至者二十日 大兵至屯班竹園總兵李棲鳳監  
軍副使高岐鳳拔營出降城中勢益孤諸文武分陴拒  
守舊城西門最險要可法自守之作書寄母妻爲訣以  
無子命副將史得威爲之後越二日 大兵薄城下城  
破可法自刎不死命得威刃之得威痛哭不敢仰視一

江都縣志

卷之十四

名宦

五十八

叅將擁出小東門爲我兵所執可法大呼曰我史督師  
也可速殺我勸之降不從遂殺之揚州知府任民育同  
知曲從直王纘爵江都知縣周志畏羅伏龍兩淮鹽運  
使楊振熙監餉知縣吳道正江都縣丞王志端幕客胡  
如琨盧渭皆從死

按郡邑志皆云可法以被執遇害養子尋其屍不  
得羣衣冠梅花嶺揚之故老曾有言可法於城陷  
時跨白騾出南門後不知其死所言無左驗康熙  
初有郡人販茶過桐城者止宿村落中其主人魁  
梧一老也說揚州變亂時事甚悉郡人叩所由來

則云某少有虎力善大刀史閣部徵爲近侍甚親  
信閣部見城將不保袒衣令某以濃墨書其姓名  
於背號泣曰余非不能卽死然欲效文天祥爲興  
復計恐或中途殲於亂軍此所以志也閣部裹甲  
疋馬由南門出予持大刀隨之未十里遇游校以  
刃砍其左股閣部撲馬下馬亦被創倒予掖起趨  
易某馬行閣部曰余非亡命蓋將以舉大事耳今  
支體斷尚奚爲急揮予曰汝未食君祿且家有老  
母可速去毋俱死言已則兵戈鼎沸至矣余閃匿  
道旁及再尋閣部但見平沙濺血跡而已迄今尤

江都縣志

卷之十四

名宦

五十九

慟閣部之以姓名志背者亦復無從別識也郡人  
徵其姓字不肯言第曰汝揚州人必尚有知詹大  
刀者此說與父老所云相近附以備考

劉肇基字鼎維遼東人以世職累遷都督同知史可法  
督師淮揚請從征自効 大兵抵揚州可法檄召諸將  
赴援皆不至獨肇基自白洋河趨赴過高郵不見妻子  
旣入城分守北門已而城破率所部四百人巷戰力不  
支一軍皆沒同時副將乙邦才自刎馬應魁披白甲大  
書精忠報國字於背戰死莊子固屯徐州募壯士以赤  
心報國爲號聞揚州被圍率衆馳三日而至城將破欲

擁可法出城遇大軍格鬪死他若副將樓挺江雲龍李  
豫副旂鼓叅將陶國祚內左營叅將許謹內右營叅將  
馮國用內前營叅將陳光玉叅將李隆徐純仁遊擊李  
大忠孫開忠都司姚懷龍解學曾等皆以巷戰死  
任民育字厚生一字時澤濟寧人天啟甲子舉人居嘗  
傲儻好奇計善騎射當路咸知其有將帥才在東省卽  
引參軍事城守濟寧兵不能入授潁州知州時四郊多  
壘民育討軍實問民疾苦三月而潁大治擢揚州知府  
督師史可法倚重之事急分門守禦先是有大星隕于  
署攬馬皆驚民育自分必死及城陷著緋衣坐堂上兵

江都縣志

卷之十四

名宦

六十

至諭降不屈欲擁之去不從飲刃死其寡女適劉氏者  
與一女在署俱縊死妾姚氏投水死幕客陳美僕聞道  
等五人皆從死有吏陸某者侍民育見其死亦自縊  
談三傑廣平人以貢生授揚州庫大使傑兄日省嘗以  
劾魏璫削跡後起爲御史死闖賊難其家蓋素篤忠義  
者三傑分守北門城陷易公服謂太守任民育曰公死  
城微員死庫遂與守同死其子生員大綱與僕天喜人  
衡亦大呼從死

周志畏字抑畏鄞縣人崇徵癸未進士甲申知江都時  
揚州鎮帥死兵無所統多暴橫凌志畏志畏不爲屈撓

取其中害民者置以法兵大譟謀劫志畏廷議調歛縣督師史可法欲倚爲任慰留之 大兵至可法守西門志畏守小東門躬被甲宿敵樓夜不交睫有勸之降者索印不付西門啟兵入執志畏擁至南郭福緣菴刃之於水志畏平時常以小鏡置懷中至是死數日無知者一僕行覓主見尸水上識其衣啟視鏡故在哭殮焉王纘爵字佑申鄞縣人以廕入太學授應天府通判攝溧水縣以剛直忤上官自投劾歸閣部史可法督師江北起爲監軍道一日可法謂爾諸生不耐兵事吾當爲奏補京職纘爵曰下官世受國恩無以爲報今願從明

江都縣志

卷之十四

名宦

六十一

公死不願從馬阮生也可法斂容謝之及揚城破從可法死焉

何剛字慤人松江上海人崇徵未由舉人授兵部職方司主事上疏募兵金華甫出都都城陷馳還其鄉募卒二千人率以訓練福王時進員外郎以其兵隸史可法可法大喜剛亦以遇知己誓同生死馬士英惡可法並惡剛出爲遵義知府可法垂涕曰子去吾更誰仗剛亦泣曰剛誓與此城存亡安敢違公踰月揚城圍剛佐可法拒守城破投井死

吳爾壘字介子浙江石門人崇徵癸未進士改庶吉士

京師陷於李賊爾壘南還謁史可法請從軍可法遂留  
參軍事時爾壘父之屏督師福建爾壘斷一指畀故人  
祝淵持歸曰君語我父母悉出私財畀我餉軍我他日  
不歸以指葬可也後從可法守揚州新城破投井死  
國朝卞三元遼東蓋州人晉忠貞壺後也順治三年知揚  
州府時戡定之始民多失業三元撫綏招徠流亡漸復  
田畝汙萊力請蠲逋緩徵期年之後地闢土滿凡侵隱  
絕戶產業告訐者三元片言剖析人皆折服更嘗親至  
學宮集士子講導大義觀聽者踵趾相錯培元氣而興  
教化揚人士所首賴焉累官至雲貴總督

江都縣志

卷之十四

名宦

六十一

李嵩陽字弦佩河南封邱人舉人順治四年以御史巡  
視兩淮鹽政時瘡痍未服失業者過半課不登額嵩陽  
勸徠憫恤新舊俱集已而督學江南先是上下江兩學  
使分校至是始合爲一嵩陽芟浮洗縲力追正始盡祛  
從前蕪穢之陋文體一變廓清之功尤大  
吳伯琮徽州人舉人順治十七年署教諭清慎厚重教  
士有方重建明倫堂啟聖祠新聖賢像功尤鉅遷宜山  
令諸生勒石志去思焉

張能鱗字西山直隸進士視江南學政公明最著集四  
書句數十聯榜各學明倫堂尤爲有功聖教留心民瘼

嘗纂集古人救荒良法彙爲成書刊布以示則效識者謂可補周官荒政之闕遷山東觀察有揚士余孔瑞者遊其門言揚子江歲貢鮭魚爲擾能鱗卽屬草疏稿上之得

旨永免江都蓋世受其遺澤云

熊明遂字仲良江西豐城人舉人順治十八年知縣事清而不刻俗故奢示之以儉聽訟者每得其情片言立剖皆愧悔自解以去歲值編審里甲自置一簿親與里戶酌劑徭均賦平吏胥不得上下其手去之日囊篋蕭然惟圖書數卷而已

江都縣志

卷之十四

名宦

六十二

軒轅允山東東平人進士康熙六年知縣事性廉潔自奉惟布衣蔬食而恤民最懇至八年以誤河工鐫級會制府至揚百姓遮訴令賢不應去制府爲疏留仍知縣事所操益勵後仍以公事落職十三年用廷臣薦復起用焉

麻勒吉滿州人順治壬辰進士及第康熙十年總督兩江清廉和惠出於至誠不假聲色能使諸屬吏奉法惟謹時海氛未靖揚郡濱江尤賴撫綏悍禦民獲安枕數十年後謳思德政猶稱麻 省云

金鎮字長真宛平籍浙江山陰人舉人康熙十三年知

揚州府先是負擔入城必上稅於府鎮以貧民小販槩  
貫之僦屋者爲減租錢貧者稱便宋歐陽修平山堂郡  
名勝地爲棲靈寺僧所占鎮興復之更修郡志皆手自  
排纂擢江南驛鹽副使晉按察使

郝浴字雪海直隸定州人順治己丑進士康熙十五年  
以御史巡鹽兩淮時三逆未平鹽法壅滯恤商裕課多  
紓良策揚屬歲歉疊勸商人捐穀源源賑濟全活饑民  
甚衆擢太常寺少卿再擢副都御史仍留巡鹽任兩載  
授廣西巡撫去日商民送者萬人

任國鑛徐州蕭縣人舉人康熙十五年署教諭正身爲

江都縣志

卷之十四

名宦

六十四

率口不言錢與諸生談文藝以行誼爲先或貧弱爲勢  
家所屈必力爲直之衆服其剛直陞翰林待詔在江都  
課子觀瀛與諸生同業未幾觀瀛成進士

湯斌字潛菴河南睢州人順治壬辰進士由內閣學士  
出爲江蘇巡撫清介坦直吏民見者如在光風霽月中  
然釐奸剔弊毅然行之不少寬假嘗毀部內淫詞除數  
百年黷祀厥功甚偉遷禮部尚書掌詹事府斌精講理  
學昌明正道蓋尤有功於聖門云

趙士麟字玉峰雲南昆明人進士以浙江巡撫調江蘇  
繼湯斌後湯務德化士麟則兼濟之以法風裁凜然積

蠹大憝悉實於理貪墨吏望風自退江都之瓜洲與京  
口一江相對旗兵驅馬牧瓜洲朝渡夕返市肆不勝其  
擾而踐踏禾苗尤爲三農之害士麟移檄軍府永禁爲  
例洲民受賜者莫大內陞吏部侍郎卒於位

高承爵三韓人康熙二十五年知揚州府爲政務持大  
體待人接物藹然可親而敏達剛介獄無冤民人咸畏  
仰之不敢干以私有黠民僞作偶神所憑令其黨故侮  
神立撲於地人益信之因得斂錢建祠陰分其羨朝夕  
祈禱者塞於道承爵初下車卽按其地撤偶神焚之窮  
治黠民吐其實荷校以示民習乃無溺於邪府舊有供

江都縣志

卷之十四

名宦

六十五

應規例取之屬邑革除自承爵始尤能培育人才所拔  
士多有致遠名者在任三載治行甚著超擢江蘇按察  
使晉安撫巡撫

夏乾御字乘六蘇州崑山人康熙壬子孝廉文名甚著  
任江都教諭規言矩行以身率教見者如負霜雪所識  
拔士稔知其賢且才必力薦之因以成名者甚衆尤務  
培士氣廩生程揚耀學博而砥行自重爲巨賈門客所  
侮創乾御將詳治之賈獻五百金乞寢其事乾御毅然  
曰子衿而不令吾戒董焉若佳士受橫辱吾官可棄吾  
牘必不可挽卒請治如法平昔精於衡文弟子中有喬

某者以藝呈乾御語其姻黨曰文有死氣此子不復能  
永年矣果踰月而殞其鑑識蓋又有出常格之外者秩  
滿報遷念諸生內間有出入公庭者素雖切責之未悛  
也因作示誡諭反覆千餘言一時爭傳誦焉未三年獄  
起而禍甚烈人尤服其先見云

傅澤洪字樸菴奉天人康熙三十二年知揚州府性嚴  
介聽斷尤明敏過人訟於庭者雖歲月屢易一見輒識  
之曰爾卽某時某事在案者也人驚以爲神部內之豪  
猾屏息不敢逞良民如安衽席上每斷疑獄凝神靜氣  
不輕發一言但令人縷陳始末就其辭以隙攻之不煩

江都縣志

卷之十四

名宦

六十六

鈎致而情實立剖自是虛誕者不敢盡其辭會水災以  
擅發倉廩鑄職攀留涕泣者溢於道久之開復留効河  
工貧至無以自給嘗以公事至揚部民爭致壺餐澤洪  
卻其餽慰遣之補宿虹同知擢淮揚道副使揚民尤被  
其惠澤洪讀書務探本原手不釋卷工於詩士大夫咸  
推服之精通水利纂有行水金鑑一百七十五卷行於  
世

張鵬翮字運青遂寧人康熙庚戌進士三十年以兵部  
侍郎視江南學政甄拔孤寒一塵不染任滿晉尚書出  
爲兩江總督移節川陝繼復改總督河道先是河員多

糜帑悞工鵬翮悉罷之遴廉幹者授以任木石椿埽皆躬自簡閱時駕小舟週視河隄諸險要規畫經理浮費盡省而河工大治三十八年河決邵伯埭更樓水從決口注下河湍急奔騰億百萬田廬莫保鵬翮至沿河焚香慟哭者數千人鵬翮亦大哭爲文禱河神趨工急築決口立堵蓋若有陰相之者口塞還清江而高家堰勢急甚鵬翮曰無高堰卽無淮揚矣爲築六壩殺其勢建洪塘埂石工束淮水水患以平數年後江都窪田盡成腴壤任九年擢戶部尚書晉吏部尚書拜大學士卒諡文端

江都縣志

卷之十四

名宦

六十七

張瑀字石公直隸無極人康熙辛未進士三十六年知江都縣事時奸猾肆行瑀取其渠魁杖殺之境内以肅創印冊以稽賦稅分十限任民輸納親投入櫃不假吏胥手至今傳爲良法瑀勤於治事躬理煩劇每逾月不解衣寢越五載以憂去

晉璿字玉衡山西長治人舉人令浙之浦江康熙四十年以治行最調知江都勞於撫字民戴之如父母丈量洲田豁坍陞漲尤稱至允後以疾去民恒思之

張廷樞字景峰陝西韓城人康熙壬戌進士已卯主江南試事名雋悉入榜中得人爲盛四十二年復視學江

南正文體精校閱公明之譽翕如史都諫申義詩曰清  
河藻鑒最知名蓋實錄也累官至刑部尚書頻出審重  
案具瞻之望集於朝野

牟欽元字東山奉天人學問該洽詩尤裁僞親雅書翰  
亦得晉人風格藝苑咸推重之歷宦以廉達著康熙五  
十三年任江蘇布政使絕苞苴修法度其設施皆本原  
經術尤留意風化所頒教令讀之者謂如誦古先哲箴  
銘欽元性磊落不能曲徇人意未幾鐫職逾年以物望  
起河南布政後晉太常寺卿卒人惜其未竟大用云

鄭任鑰字魚門福建侯官人以五經魁鄉會試康熙丙

江都縣志

卷之十四

名宦

六十八

戊進士居翰林介然特立清望著館閣間五十九年視  
江南學政以行李一肩車一輛從騎一人出國門舉朝  
嗟異之訓士先實學而後文藝衡鑑公明無或有以奔  
競僥倖進者所頒教條四則曰審學的敦本行慎言動  
讀正書凡皆諄諄於人心世教云遷湖南布政使陞湖  
北巡撫晉左副都御史罷任歸蕭然寒素天下以真人  
品目之

齊蘇勒字金城滿州人雍正初以兵部尚書總督河道  
涖政清勤全河受庇其功在江都者疏復瓜洲花園港  
運道仍建牓啟閉以順地勢堵瓜洲城西新開河道以

免江水逼城之患民賴以安皆焚香尸祝焉

蔣鶴鳴字陞遇浙江嘉興人令舒城雍正二年以才能調江都廉靜和平歲飢盡力設賑立粥廠延紳士之賢者董其事精詳有法民得實受其賜舉同仁會周貧乏者學宮舊無樂器祭器鶴鳴剏製之以銅件繫其觔兩著之籍越歲以捕蝗積勞卒於官

袁載錫字心友松江青浦人康熙戊子舉人夙負文望署江都教諭月課生童品題不苟赴者雲集廣文寒氈載錫又素廉潔不屑屑於諸生餽贄遂益貧每課期爲質衣備試卷具飲食坦然行之不少倦丁祭必誠必恪

### 江都縣志

### 卷之十四

名宦

六十九

捐俸募修學宮兩廡及名宦鄉賢祠年逾八十卒於官歸葬時傾學白衣冠送之

吳銳字穎長當塗人素有名譽中辛卯經魁任江都教諭立教先砥礪廉隅士習爲之不丕變公庭鮮有子衿之跡其自處尤刻厲隻身攜奚童二人首蓓盤殮取嚴一介務興風化於節義表章必力富室則絕不輕履曰毋使五經掃地也雍正十三年薦舉博學鴻詞未幾卒

徐士林山東人癸巳進士素爲清流冠冕任江蘇按察使歷布政晉位巡撫居官直大以方而通德類情不屑以苛察爲務吏民咸欽戴之振興書院政暇卽親課文

藝三吳之士風增盛焉以母老不能迎養子處官署亦  
不受妻孥之奉憂思成疾屢疏陳情乃得歸襍被蕭然  
如婁士也道卒

上念其公忠悼惜者無已

命祀在京賢良祠

張渠字濟川直隸三河人雍正十三年由廣東布政使  
調任江蘇時賦役行版圖順莊之法閭閻不勝其擾渠  
力請復均田均役舊制民戶胥利便之乾隆三年陞湖  
南巡撫四年復調撫江蘇值比歲荒歉奏請動帑採買  
米穀貯倉備賑截留漕米價銀二十餘萬兩委員赴江  
楚等省多購穀石俾緩急有資東南半壁永以賴之後  
再調湖北卒於位

江都縣志

卷之十四

名宦

七十

